

## FH GRISCHUNA

## Dapli students che l'onn passà

Il nov semester da studi a la Scol'auta spezialisada dal Grischun ha cumenzà. 674 studentas e students èn s'inscrits per in studi da bachelor u da master. Suenters dus onns cun pli paucs students sa midia tenor la comunicaziun da la scola la tendenza puspè en direcziun dapli students. Il dumber da students novs è creschì per 18% en cumparegliazion cun l'onn avant. Da las persunas immatriculadas da nov èn prest in tschintgavel dal Grischun.

La Scol'auta spezialisada dal Grischun porscha las suandantas direcziuns da studi: architectura, inschigneria, turissem e differents spiertas d'informatica. (rtr/fmr)

## CUIRA

## Nova pussaivladad d'empresar velos a Cuira



Er sper la chasa da medias dad RTR è ina staziun d'empresar velos.

FOTO GABRIELA RIEDI

A Cuira datti ussa la pussaivladad d'empresar velos. Il chantun Grischun ha lantschà ensem cun Pro Velo Grischun ina rait cun 10 staziuns e 60 velos ed e-bikes a Cuira.

Sper il chantun sustegnan er la Scol'auta spezialisada dal Grischun, la Scol'auta da pedagogia dal Grischun, l'Ospital chantunal sco er la citad da Cuira la finanziaziun d'ina staziun da parter velos en la citad. Empresar pon ins ils velos sur l'app Publi-Bike u sur il SwissPass. Las collavuraturas ed ils collavurators dals partenaris pon duvrar ils velos gratuitamain per 30 minutas.

A Cuira duai il nov sistem vegnir testà per nov mais. Sch'il manaschi da test ha success, duai la rait vegnir extendida ed ulteriuras staziuns en las aglomeraziuns vegnir integradas en il servetsch permanent, uschia il chantun. (rtr/fmr)

## ELECZIUNS 2023

## Gasser en il Cussegl naziunal per Sviz



Josias F. Gasser candidescha en il chantun Sviz per il Cussegl naziunal.

FOTO SOMEDIA

L'interpredider ed anteriur cusseglier naziunal grischun Josias F. Gasser candidescha en il chantun Sviz per il Cussegl naziunal. Gasser è sin la glista dals verd-liberals (PVL). Quai tenor il portal «march24». Gasser è stà dals 2011 fin 2015 en il Cussegl naziunal per il Grischun – l'emprim Grischun per la PVL. Or da raschuns privatas è el sa retratg 2021 dal Cussegl grond grischun per il qual el ha represchentà la PVL durant 11 onns. (cdm/fmr)

## LA CIFRA DAL DI

# 120

## alps cun chascharia

datti en il Grischun. Quellas produceschan mintga stad 600 tonnas chaschiel d'alp. Quai scrivon ils Producents svizzers da latg sin lur pagina d'internet. Uss èsi dentant finì cun la produziun da chaschiel d'alp, almain fin l'auter onn, cura che la muaglia po puspè ir si en ils auts. (fmr/ri)



Privilegi – avair sco president in agen biro.

FOTO CLAUDIA CADRUVI

## Maraton da sesidas cun «enorm plaschair»

Martin Candinas sbriga tras la Wandelhalle. El vegn gist dad ina sesida ed en mes'ura cumenza gia la proxima. Il «pli aut Svizzer» ha reservà ina mes'ura per la FMR che less savair tge ch'in president dal Cussegl naziunal traffica atgnamain l'entir di. Martin Candinas tradescha ses program da quest glindesdi.

CLAUDIA CADRUVI/FMR

## 6.30 – or da letg

Il pli aut Svizzer leva e sa semtg per in lung di. El n'ensolva nagut, el n'ensolva mai. Anc duas emnas cuzza sia ultima sessiun sco president dal Cussegl naziunal. L'entschatta da la sessiun d'enviern surdat Martin Candinas il timun a ses successur u a sia successura.

## 7.30 – duas sesida

Il di da lavur cumenza cun ina sesida che n'ha da far nagut cun l'uffizi. Martin Candinas sto gea era liquidar sia lavur «normala». Tar quella tutga per exempel il presidi da la LITRA, l'organisaziun che defenda ils interess dal traffic public. Martin Candinas s'inscuntra cun il mainagestiu da la LITRA.

Els preparan ina sesida cun il secretari general dal Departament federal per ambient, traffic, energia e comunicaziun (UVEK). Lezza sesida cumenza da las 8.30.

## 9.45 – biro cun bandiera

Sur la porta-biro paradescha l'inscripziun «president». L'inscripziun è aposta fatga per rumantsch per quest'onn presidial. Martin Candinas beneventa la FMR en ses biro. Igl è ina stanza cun in candelaber pompus, tapetas da color dad aur ed ina gronda bandiera svizra sper il pult.

Avair in agen biro saja in privilegi, di Martin Candinas. Mo duas persunas dal parlament hajan in agen biro en Chasa federala: il president e la presidenta da las duas chombras federalas. Gia oz deplorascha el ch'el sto prest renunziar puspè a questa cumadaivladad. Ma l'onn presidial dura halt be in onn.

## 10.15 – preparar segund'emna

Ensem cun il secretari general sa prepara Martin Candinas sin la segunda emna da sessiun. Da las 11.30 sa raduna l'entir biro dal Cussegl naziunal per cuntinuar cun las preparativas.

## 12.15 – Uruguay

Il collega dad Uruguay fa visita a Martin Candinas. Sebastián Andujar presidescha la chasa da represchentants dal Uruguay. Ils dus umens èn gia s'inscuntrads cura che Candinas ha visità l'America dal Sid. Uss sa posteschan els sut las statuas dals trais confederads en Chasa federala per sa laschar fotografar.

Nundumbraivels inscunters cun magnats e magnatas da l'entir mund ha Martin Candinas gi quest onn. Era il papa Francestg ha el dastgà visitar – in mument culminant.

## 13.00 – maisa sco da perdunanza

Circa ina mes'ura è reservada per in discurs secret tranter ils dus presidents dals parlaments. Schurnalists na dastgan betg tadlar tge ch'els dian



Inscripziun fatga aposta per l'onn presidial da Martin Candinas.

FOTO CLAUDIA CADRUVI



Martina Candinas cun Sebastián Andujar, president da la chasa da represchentants dal Uruguay.

FOTO PARLAMENTSDIENSTE/TIM LOOSLI

in a l'auter. Sulet la dolmetschra è preschenta.

Suenters datti gentar. La FMR dastga dar in tgit en la stanza da mangiar. Per otg persunas èsi mess a maisa cun tuaglia alva sco da perdunanza. Ils pitschens bouquets da flurs en blau, alv e mellen han las colurs da la bandiera dad Uruguay. Bun appetit!

## 14.15 – bimbimbim

Il sun cler dal scalin dal president tuna tras il Cussegl naziunal. Il mar-mugnar da var 200 parlamentarier e parlamentarieras tschessa. I cumenza l'ura da dumondas. Il Cussegl federal sto responder a 31 dumondas.

Martin Candinas na maina betg l'entir suentermezdi il cussegl. El surdat ses scalin al vice-president. «El sto la finala era emprender da manar il cussegl», manegia Candinas che na sesa betg pli ditg sin la pli auta sutga en il Cussegl naziunal.

## 16.00 – represchentants dal Grischun

Ina delegaziun grischuna vul discurre cun Martin Candinas per eruir co schliar problems che lur vischnanca ha cun in uffizi federal.

## 18.00 – responder e-mails

Il Cussegl naziunal discutescha davart «bajegiar ordaifer la zona da biodiversità, davart intelligenza artificziala en connex cun la segirezza dal provediment d'energia. Martin Candinas surlascha il timun a ses vice. El va en biro per responder e-mails e liquidar pendenzas.

## 21.30 – rumantsch

Plaunsieu van a fin las debattas dal glindesdi. Il president sesa puspè a la testa dal Cussegl naziunal. Sco adina terminescha el la sesida cun intgins plets rumantschs.

Tanta preschientscha sco quest onn ha la quarta lingua anc mai gi en Chasa federala. Ed uschia è il rumantsch era stà d'udir uschè savens sco anc mai en las stivas svizras dals aspecturs da televisiun u da las audieturas da radio.

## 24.00 – ir a tutter?

Sa durmenta Martin Candinas tgisà gia avant u pir suenter mesanotg? Stanchel avunda vegn el en mintga cas ad esser.

Ils dis da sessiun èn enorm intensivs. Era las fins d'emna èn occupadas cun termins e viadis. E lura èsi gea anc cumbat electoral. En tschintg emnas elegia la Svizra in nov parlament. Quai augmenta il squitsch e la tensiun per il president che sto gea era batter per ses sez en la chombra gronda.

Tuttina sincerescha Martin Candinas l'avantmezdi durant l'inscunter cun la FMR ch'el veglia gnanc anc pensar londervi da dar giu l'entschatta december il presidi. «Jau fatsch enorm gugent quai ed i fa enorm plaschair.»